



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

Tir Yimym

tiryimym@aolima

tir yimym

TAPAK 10



EAM S. Jaishankar-i anogo
asemnü atema Singapore semdang



Garbine Muguruza-i
WTA Finals kokogo

VOL. XIX NO. 42 (ADOK 42)

DIMAPUR

ROGONÜ (THURSDAY) YIMPOKSÜI (NOVEMBER) 19, 2021

₹ 5.00

Governor Prof. Jagdish Mukhi-i Khonoma semdang



Assam aser Nagaland Governor, Prof. Jagdish Mukhi aser pa kinungtsü Prem Mukhi nati November 18, 2021 nü Khonoma yimti semdangba mapang tangokba noksa ka yangi angur.

Dimapur, Yimpoksi/Nov. 18 (TYO): Assam aser Nagaland Governor, Prof. Jagdish Mukhi aser pa kinungtsü Prem Mukhi nati November 18, 2021 nü Khonoma yimti semdanga liasü.

Iba mapang Governor-i Khonoma nung alirtem den sensaksem aka aser India nung mezüngbuba 'green village' ya süng atsünga aser shikariba nungi tzüngtong-litong aser arem shiruru wazüka ayur akumba indang otsü pa den lemsatepa liasü.

Eco-tourism village ka ama, yimtsüng telok balalai khuret balala abenba indang pa nem angatetdaka liasü.

Pai Khonoma nung alirtem den jembiba mapang, Khonoma nüburi British nung den nok-onü tejem amer rara takok anguba otsü kakat ka nung züngshi, ta ashi aser parnok ya tasü tait, temolung tulu lir, ta ashi.

Nagaland Governor mapa

agizükba sülen pai yimtsüng mezüngbuba semdangbaji Khonoma ya alitsü aser Khonoma nübur kanga akumtsüba züngshir, ta pai ashi.

Yimdaklirtemi eco-tourism mapa inyakba atema pai pelaba lemsatep aser lenmang tajungba kuma yanglushitsü asoshi sorkar den jembitsü, ta pai shia liasü.

Kasa mapang Chairman KNCTS, Kezhaseria Meyase ajanga Khonoma Nature Conservation and Tragopan Sanctuary indang rateta ashi, ETMC Chairman, Nikedolie Hiekha ajanga yimtsüng nung Eco-tourism indang jembiba, Wild Life Warden Dimapur, Tokaho IFS ajanga yimtsüng nung Forest Department-i inyakba indang PowerPoint presentation agüja liasü.

Iba sentong nung SDO (C) Kohima, R. Daniel Angami menden liasü

Metongshitsür

Dimapur, Yimpoksi/Nov. 18 (TYO): Züngzünga mereprangba ajanga sangdong nung Dimapur Urban Council Chairmen Federation (DUCCF) aser Joint Coordination Committee (JCC)mendenpurtem meinoksemba atema sasa bilemer, ta Naga Council Dimapur tongti zülur,

Thsapongkyu Sangtam-i sangdong ka ajanga ashi.

Anungji NCD conference hall, Nyamo Lotha Road, Dimapur nung November 20, 2021 anepdang 11:00 ako nungi amentsü aliba senden nung DUCCF aser JCC mendenpurtema arua adentsü mepishir, ta sangdong ajanga ashi.

Kohima dist nung 'Har Ghar Dastak' sentong tenzükogo

Dimapur, Yimpoksi/November 18 (TYO): COVID-19 vaccine mezüngbuba aser tanabuba dose nisung timba nem agütsütsü atema MoHFW tetuyuba aser state sorkar guideline tem dak ajemdaker Chief Medical Officer Kohima, Dr Vezokholu Theyo aser lar medical team-i November 8 nü district nung 'HarGharDastak' (knocking on every door) campaign tenzükogo.

Iba vaccine agütsüba sentong nung shilem ka ama tang tashi nung district kübok yimtsüng aser jila balala aika ayimjema inyakdar aser November 30 nü tashi maneni inyakyonga aotsü.

Sentong benoka inyakba mapang medical team-i district nung aliba lisopurtem nem vaccine timba agütsütsü atema aser vaccine dak sendakba nung tangazükba balala agütsütsü asoshi kishiai tua inyaksangshitsü. Iba inyakyim ajanga kidang manemi alirtem mesera temang nung timtem aliba ajanga kidang nungi mayazükteki alirtem tonga oa vaccine agütsütsü.

'HarGharDastak' campaign ya district nung COVID vaccine nisung timba nem agütsütsü aser vaccine mezüngbuba dose magi alirtem aser tanabuba dose agütsü alirtem jangjatsü atema lir.

BAN teloki Naga entrepreneur-tem asoshi teyari meshir

Dimapur, November 18 (TYO) : Alima ajunga nung Covid-19 tashidak wara agi amokmerenba tensa tia nung Nagaland nunga state government-ia akok tashi nübortem taküm kümzüksü asoshi mozü kitem tajungba yanglushia sen aika endoka tapet mapa inyakogo, saka talisa business inyakertembo aika kanga takoksa tia nung lir, anungji parnokji government-i yaritsü nungdaker ta tawa Business Association of Nagas (BAN) teloki sangdong ka nung metetdaksüogo.

Nagaland nung rongsen renloktsübaji business aser industries nungi dang renloktsü aser lanurtema government mapa mebushii peisasa mapa bushiteta inyakertembo aser idangjibo business inyakertem aser industries kiburtemi alimelen agütsüba agi government takar akümsü, anungji akok tashi state nung peisasa mapa bushiteta

inyaker entrepreneur-tem nungita yaritsüsa government sentong alitsüla ta parnokisa metetdaksü.

Central government-ibo alima tashidak wara aruba agi mapa meinyaket anener alirtem yaritsü asoshi sen crore lakh aika agütsüogo aser item sentemji state governemt ajanga bank nungi apua amshitsü asoshi agütsüba sen lir, saka Nagaland nungbo bank nungi entrepreneur-temi sen maputetter, ibaji talisa SARFAESI ozüng mamshitetba ajanga lir ta BAN telokisa metetdaksü.

Iba ama tensa tia ka nung, Nagaland nung business inyakertem ya akhi tsürabur mapang nungi business inyaka aruba nisungtem masü saka tangang mezüng business nung tetsüng ajemokertem lir, iba jagi balaka peisasa mapa tenzükka inyakertem entrepreneur-tem aika takoksa nung

mapa anenogo aser aika takoksa marem anentsüba lir, anungji itemji tanaben shia arua mapa tenzükka inyakertem asoshi state government-i bank nungi sen aputetsüsa lenmang lapoktsütsüla ta BAN sangdong nung tir Wb.L.Mongkum Jamir aser tongti zülur Dr. Yan Murry nati metetdaksü.

Iba denji business inyakertem asoshi light bill aser government kidang alirtem atema ki bara ita 12 atoktsüla aser mapa inyakertem nem senotsü teyari agütsütsüla ta parnokisa metetdaksüogo.

Ano, Nagaland Industrial Policy kübok government asoshi osettsüset alitsü atema aser contract mapatem asoshi e-tendering inyakertem nung inyaktsüla aser Naga nungertem dang nungibo Earnest Money magitsüla ta BAN telokisa takangba ka agütsüogo.

Nagaland COVID-19: Nisung 8 dak putet, nisung 19 taneptsü angu

Kohima, Yimpoksi/Nov. 18 (TYO): Nagaland nung tanü nisung ti dak COVID-19 tashidak putet aser nisung 19 taneptsü angu, anungji state nung iba tashidak agi meneper nisung 32,032 jungogo.

Positive cases ya Mokochung district nung pezü, Dimapur district nung asem aser Kohima district nung ka alitsü, ta State Nodal Officer for Integrated Disease Surveillance Project, Dr. Nyanthung Kikon-i anogoshi sangdongba COVID-19 bulletin nung ashi.

Tesüiba ghonda 24 tsüngta iba tashidak nungi taneptsü angur nisung 19 liasü aser parnok ya Dimapur nungi 17, Kohima aser Mokochung nungi kaka alitsü, anungji state nung coronavirus nungi taneptsü angur nisung 30,153 jungogo, aser taneptsü

anguba rate ya 94.14 alitsü.

Tang state nung active cases 131 lir aser item rongnung nisung 21 dak tashidak agi timtem agütsüba sümia lir, nisung ka tera timtemer, nisung pezü kanga kangshir aser nisung 105 dak iba tashidak agi timtem agütsüba mali, ta pai ashi.

Anogo ananü atonga iba tashidak ajanga nisung asüba mali, anungji state nung tasüba nisung 695 dang alitsü aser yangji nisung 16 dak danga tashidak liasü.

Ajak senteper COVID-19 agi shiranger nisung 1,051 danga state temi ogo, ta pai ashi.

Nagaland nung tang tashinung COVID-19 alitsü temolung melemteti sample 4,05,497 tendanga lir. Item ya RT-PCR nung 111,351 tendang, TrueNat nung 87,586 tendang aser Rapid Antigen Test nung 2,06,559 tendang, ta Dr.

Kikon-isa ashi.

Bodhbarnü tashinung Nagaland nung nisung 7,21,624 nem COVID-19 vaccine 12,47,904 agütsüogo, ta State Immunization Officer, Dr. Ritu Thurr-i metetdaksü.

State nung iba mozü agir alirtem ya frontline nung inyakertem nisung 60,975, healthcare nung inyakertem nisung 15,999, arishi küm 45 nungi tema nisung 204,608 aser arishi küm 18 nungi 44 tsüngta nisung 440,042 alitsü, ta pai ashi.

Nisung 5,26,280 nem mozü dose tanabuba agüja parnok vaccination course tembangogo. Parnok ya frontline nung inyakertem nisung 48,225 alitsü, healthcare nung inyakertem nisung 13,463 alitsü, arishi küm 45 nungi tema nisung 1,67,972 aser arishi küm 18 nungi 44 tsüngta nisung 2,96,620 alitsü, ta Dr. Thurr-i ashi.

Labour Commissioner ajanga e-SHRAM atema metetdaksür

Dimapur, Yimpoksi/Nov. 18 (TYO): India nung puti otsü nung tang mezüngbuba, e-SHRAM ta ajaba single window portal ka Ministry of Labour and Employment, Government of India ajanga yanglua lir. COVID-19 tashidak wara mechi linük tesem ajunga nung lockdown benoka aliba mapang unrecognised worker crore 38 shii timtem balala ajuruba tali tajungba nung metetdaksü asoshi National Database of Unorganised Workers ka linük nung yanglutsü atema Unorganised Workers ajunga tenüng züluktsü atema iba portal ya yanglu, ta Labour Commissioner ajanga sangdong ka nung ashi.

Unorganised worker dak sendakba nung Ministry of Labour & Employment ajanga agütsüba social security aser welfare scheme balala tajungtiba nung inyakba nung yaritsü atema aser kasa mapang parnok lungjemdakja ano danga ministry temi inyakba tem aita daksütsü nükjidong nung e-SHRAM ya renem, ta ashi.

Emergency aser linük tesem ajunga sünga tashidak wara jatetba

tensa nung iba database ya amshia temsüa aliba unorganized worker nem nungdakba teyari agütsütsü, ta sangdong ajanga ashi.

e-SHRAM kübok register süa aliba worker tem nem unique permanent 12 digit Universal Account Number ka agütsütsü, koba ajanga linük tesem ajungalen nungi social security mesüra welfare scheme tem agütsüba nung amshitetsü aser iba yagi PMSBY kübok mezüng küm atema accidental insurance sen lakh ana tashi agütsütsü aser iba sülen beneficiary den asüngdangteper küm ka nung sen 12 agüja maneni amshitetsü, ta ashi.

Iba portal nung registration ya pei sasa www.eshram.gov.in mesüra anasatiba CSC centre nungi agitetsü.

Migrant workers, agricultural workers, MGNREGA workers, ASHA workers, kidang amenoker inyakertem, anganwadi nung inyakertem, yimtung nung yokyayokchirtem, kidang yariteperem, rickshaw anirtem, taxi driver, anogoshi aayanglen senzürtem aser item mesükba

unorganised sector nung inyakertem arishi küm 16 nungi 59 tsüngta Aadhaar aser bank account alirtem portal nung angati register sütetsü, ta sangdong nungsa shia lir.

State nung e-SHRAM project tekeratiba nung mapa kuma inyaktsü aser mita repringtsü atema sorkari committee ka tentetogo, koba dang State Monitoring Committee ta ajatsü aser yangji Chief Secretary tekolakba asütsü aser District Implementing Committee nung Deputy Commissioner tekolakba asütsü, ta ashi.

National Statistics Office (NSO) survey report ajanga ashiba ama, Nagaland nung unorganised worker lakh 6.3 shi lir, anungji temsüa aliba unorganised worker ajunga portal nung register asütsüla, kechiaser portal nung register asüba ajanga dang welfare scheme shidak agütsütsü.

Iba dak sendakba nung jangshitsü mesüra teyari aginüra, Labour Department mesüra District Implementation Committee den tongtepratep nung ajungtsü, ta sangdong ajanga ashi.

Mkg town kübok Aongza Ward nung 'Heritage Wall' yanglu



Mokokchung ADC & MMC Administrator, Shashank Pratap Singh IAS-i Aongza Ward nung Heritage Wall lapoktsür külen Mokokchung town kübok ward 18 nungi yimsüsürtem den tangokba noksa nung angur. Mokokchung, 18th November, 2021

Mokokchung 18 Nov (TYO): Mokokchung town kübok Aongza Ward nung "Heritage Wall" ta sür Aor sobaliba zülu tapu balala keter jara tuluka tanü Mokokchung ADC & MMC Administrator, Shashank Pratap Singh IAS-i 18th Nov, 2021 nü meraketa lapoktsüogo. Iba heritage wall ya Mokokchung Municipal Council (MMC) den külem sür Aongza Ward Yimden-i yangluba lir.

Shashank Pratap Singh-i mapang tatsüka agia jembidang, asen indang takar sobalibaji wazüka ayuba den ibai ajungkettsü merangtsüla, kechiyong sobaliba senmangtsümang ajanga asenok nem tepela agütsür, ta ashi. Paisa nübör ajangzüksü atema tangatetba tajung nung ali

tenlar Imlong Chang-er kibong dang pelaba metetdaksü.

"Nija li tenlatsüba ya ajungshitsü nungdaker. Alima renloktsü asoshi asenoki ali tenlatepbaji nisunger shisatsü tejakleni renlokba mapa ka sayur aser ibaji asenoki ajungshitsüla", ta pai shisem.

'Heritage Wall' mapa ya tila ka amai dang saka ibai mangdang tulu aketba mapatong ka lir. Iba jara ya asen sobaliba aser yimsüyimpong wazüka, kümzüka aser sayutsü asoshi yangluba ka lir. Iba HW ya Mokokchung town nübör meyong asütsü, anungji, senso ajaki iba jara ya akok tashi kümzüka aser kanga junga anepalua ayutsü merangdi, ta Aongza Ward Chairman, R. Longritemjen Ao-i metetdaksü.

Iba sentong nung All Ward Union Mokokchung Town President Limanungsangia mapang tatsüka agia jembidi. Aongza Ward Secretary Dr. Aoyimsen Jamir menden liasü aser Aongza Ward youth Association Sunelong Kichu-i tepela o lemsatet. MTBA Assoc. Pastor Rev. Sentimeren Jamiri temoatsü meshia sarasadem. Sentong nung Mokokchung town kübok ward ajak nungi chairman aser secretary-tem arua aden.

Iba heritage Wall ya taoba mapang MMC indang jana intokba tesem ka liasü, ibai Aongza ward nung aliba petrol pump anasa to lir. Iba heritage wall ya Allen Mark Longkumer-i design asü aser pai tekaden süa yanglu.

Mon nung shiranger anüker anenzükdak ki semzüksü



Dimapur, Yimpoksi/ November 18 (TYO): Director, Urban Development Department & Mission Director, State Urban Development Agency, Takatuba Aier-i November 17 nü Mon nung shiranger anüker anisüngzükdak ki (Patient Attendant Lodge) ka semzüksüogo. Iba project ya DAY-NULM kübok Urban Development Department-i achaayanga inyaka liasü.

Sentong nung Aier-i, NULM Scheme kübok inyakyim balala indang metetdaksü, koba kübok iba ki yangluogo, ta ashi. Paisa, shiranger anükertem anenzükdak amala kitem yanglutsü atema temelaba

agütsütsü asoshi Ministry nung temelaba agir Urban Homeless (SUH)-DAY-NULM ya yanglushiogo, ta ashi. Pai ashiba agi, district kübok tesem balala nungi senoktsü agi anünga aliba shiranger anükertem nem teyari agütsütsü atema iba amala jenjang agütsü nungdaka liasü.

Director-i, Lodge inyakyim indang guidelines metetdaksü, kong Deputy Commissioner mesera Town Council Administrator tekolak ser committee ka tentettsüba, ki anepalutsü atema taa tera agütsüba, jenjang dalang agi chiyongtsü agütsütsüba amala densema lir.

Pai, iba kidang yipden 23 lir, kong tenügdakba facility ajak

inokja lir aser iba den 24x7 tzi supply, kitchen, dining room amala densema lir, ta ashi.

Maneni Aier-i, Department kübok self-employment schemes balala aliba indang metetdaksü aser district nung aliba nübörtem dang iba amala scheme tem bushia agütsü aser parnok libaliro ajungkettsü atema shisa kaa amshitsü ajungshi.

Sentong nungsa Deputy Commissioner Mon, Thavaseelan K, IAS-i, district nung iba project benoktsü atema tetsükdaksü kar aliba mapang teyari agütsüba atema Department, lokti tentet balala aser NGO tem dang kanga pelaba lemsatet. Pai, iba project ajanga district kübok tesem balala nungi arurtem tebilemstü tulu ka bentetstü ta ashi. Pai, Department aser taoba AUDO Mon, Y. Kunyangse lenisüba nung iba project takaratiba nung tembanga inyaktetba atema parnok dang kanga pelaba lemsatet.

Maneni DC-i, nübörtem dang iba ki ya ajak ajangzüksü atema anepalua amshitsü ayongzük.

Iba ki semzükba sentong ya AUDO Mon, Thungdemo R Humtsoe lenisüba nung agi aser Dr. Wungyong Konyak-i lokti pelaa agizükba o aser P. Ngaching Konyak-i tepela anküp o jembia liasü.

Mokokchung nung Jan Jagaran Abhiyan sentong tenzükogo

Dimapur, Yimpoksi/ November 18 (TYO): "Jan Jagaran Abhiyan" program (People's awareness Program) kübok All India Congress Committee aser Nagaland Pradesh Congress Committee tetuyuba nung tanü District Congress Committee, Mokokchung-i party office nung Card Campaign Program amenokogo.

Iba sentong mamenoktsü tsüngda DCC, Mkg tiri, iba sentong ya Centre nung BJP-i aniba sorkar aser state nung NDDP-i aniba sorkari tenügdakba oset balala nung jenjang tali küma aoba mazüokteti nübörtem timtem nung toktsüba indang lisopurtem nem angatetdaksütsü atema amenok ta ashi.

Card tem nung; Inflation is Taxation without Legislation,

nübörtem sensaktia aser yatzüra nungi kümzüka; yatzüra aliba nisung ka atema jenjang masü saka chiyongtsü tongtibangba; sensaktia aser yatzüra nung temelenshi aruogo; totzü nung jenjang ajungketba ya inflation tera lir; ache din ya lisopurtem atema masü saka Delhi nung sorkar atema ta yimyim balala zülur jila nung nisung 2000 tema nem lema agütsüogo. Tir Opendangba aser General Secretary Temsu nati anir DYC volunteer temi card tem lemja liasü.

Congress party-i, iba sentong ya Congress party kija atema masü saka state nung aliba nübörtem ajak atema tang angateta pusemstü imlaba lemsatetba liasü, ta DCC tir Watimongba Aier aser General Secretary (Admn) P. Aley nati külem sangdong ka ajanga metetdaksü.

Chandu Kr Agarwal nem doctorate agütsü



Dimapur, November 18 (TYO): Dimapur nung senso küma alir, Marwari nung Wb.Chandu Kumar Agarwal nem Royal American University-i honorary doctorate agütsüogo. Pa ya rongsen bushibaren nung dang masü saka loktiliba nung nübörtem nungdak repringteta mulungsua teyari agütsür nungtugu nisung ka lir. Iba ama mekurui anibelem agia nübörtem asoshi mapa tajung inyakba repringteta pa nem

iba jenjang ya taoba ita October 21, 2021 nü Hotel Le Meridien, Dubai, UAE nung agüja liasü. Kasa mapang, October 22 nü Global Business Federation telokia Hotel Oberoi, Dubai, UAE -i ayongzükba sentong ka nung, pa nem Global Excellence & Leadership Award agüja liasü.

2019 küma nübörtem asoshi yimjung aser temeim mapa inyakba atema National Virtual University-i pa nem honorary doctorate jenjang agüja liasü.

NLA Session atema car pass tem Nov 23 nü nungi agütsütsü

Dimapur, Yimpoksi/ November 18 (TYO): 13buba Nagaland Legislative Assembly Session tekububa, koba November 25 nü nungi tenzüksü lir, iba dak sendakba nung Car Passes aser Official Gallery Passes tem November 23 nü nungi Office mapang agütsütsü. Ministers, Advisors aser AHOs temi Car Passes aser Gallery Passes tem Special Secretary (Home), Civil Secretariat,

Nagaland, Kohima nungi agizükttetsü.

MLA, P.S/P.A ajaki Car Pass tem Reception Counter Gate No-II, Nagaland Legislative Assembly Secretariat nungi agizükttetsü.

Kasa mapang nung HoDs, IPR aser osangbenertemi parnok indang Car Pass tem Reception Counter, Gate No-I, Nagaland Legislative Assembly Secretariat nungi agizükttetsü.

Mon DPDB senden menogo

Dimapur, Yimpoksi/ November 18 (TYO): District Planning and Development Board (DPDB) Mon senden November 18 nü Deputy commissioner, Mon office Conference Hall nung menogo.

Senden nung Ukha Union Mon züngoksemtsü atema benokba onük lemtep aser tejakdangi abentsü lemtep. District Economic and Statistical Officer, Mon-i senden nung dena alir ajak nem Nagaland Statistical Handbook 2021 lemja liasü.

Kasa mapang nung EE PWD (R&B) Department Naginimora aser EE PWD (R&B) department Aboi-i department inyakyimtem indang metetdaksü.

Senden nung board züngsem tasen; Asst. Urban Development Officer, Thungdemo R Humtsoe aser District Sports Officer, Thepfuradi Zumvu na metepelaba mapang agia liasü. Iba senden ya DC Mon, Thavaseelan K, IAS lenisüba nung agia liasü.

MULUNGNEN O



LATE P LANU JAMIR (UNGER)

07/08/1937- 08/11/2021

Apijemtsü Shin 15:13

"Tepela mulungjangi tejak sangwadaktsür."

Ozü kinungbo aser tsürabur taküm junga alidang aser pa manemi aliba mapang nungi pa teti tatem makai alitsüba kotak limai aoba anogo nung aser tang tashia onok dang meima shirnokisa sarasadem, nübo aser rongsen agi yaritepogo, nenok ajak dang onoki kanga pelaba lemsateper. Asen Tulusang Tsüngremi nenok ajak talubosa moajangma ta onoki sarasademtsür.

~ Temeim Kinungtsü, Chirnur, Semchirtem aser Anükapangtem.

NIA-i Assam-Mizoram arrtsü nung tesem kar meita ao

Guwahati, Yimpoksüi/November 18 (Agencies): National Investigation Agency (NIA) nungi ketdangsurtemi Assam aser Mizoram arrtsü kübok Hailakandi district nung bomb ana apokba dak sendakba nung ken o bushisüngdangogo. Bushisüngdang ya Mongolbarnü Hailakandi district kübok Ramnathpur tesem nung süa liasü, ta NIA ketdangsur kati ashi. August ita Pakua Punjee LP School aser Dilwar Hussain

Mazumdar'er kidang bomb pokdaktsüba dak iba ken o sendaka liasü, ta ketdangsurisa ashi. Ken o bushisüngdangba mapang tashishitsü aketba kuli kakettem, digital devices aser tanga osettsüttem ngutetogo, ta NIA ketdangsurisa ashi. Paisa, iba ken o dak sendakba nung maneni bushisüngdang südar, ta ashi. August 13 nü Hailakandi district nung amenoker aliba Pakua

Punjee Lower Primary School poksatsü. Mizoram den arrtsü dak sendakba nung mangatetep adoker aliba teyalong nung iba primary school nung bomb pokdakja liasü. Aikati Mizoram nungi ozüing raksartemi iba lendong bener arutsü asütsü ta temulung melemi belimer. Kasa anogo Dilwar Hussain Mazumdar'er kidang bomb ka pokdakja liasü.

Manipur nung bomb apok; nisung asüba osang kecha mali

Guwahati, Yimpoksüi/November 18 (Agencies): Brehostibar anepdang Manipur, Imphal West district kübok Koirengi tesem nung bomb ka apok. Police-i ashiba agi, iba lendong nung nisung asüba osangbo kecha mali, kechiyong bomb ya anepdang yakta poka liasü.

Iba bomb ya East District kübok Mohammad Tolen'er dokan anasa Brehostibar anepdang 4 ako shi nung apok, ta police ketdangsur kati ashi.

Iba bomb pokdaktsüba ya osang agütsüba mapang tashi nung telungpur telok kati danga nangzüka maliasü.

Lendong ataloki police tem iba tesemi aritepa ao aser iba bomb pokdaktsürtem aputsü atema bushisüngdang tenzük.

Manipur nung Honibarnü Myanmar arrtsü nung aliba Churachandpur district nung telungpurtemi Assam Rifles Colonel Viplav Tripathi aser

para-military force sepa pezü khasetba sülen Army aser para-military Assam Rifles densema Security forces kanga kümükümshir aliba mapang ka nung iba lendong atalokogo.

People's Liberation Army (PLA) aser Manipur Naga People's Front (MNPF) telungpurtemi armendanga atar sepaitem amakba mapang Tripathi kinungtsü aser par jabaso dena khaseta liasü.

Honibarnü telungpurtemi sepaitem amakba sülen security forces-i, Manipur kübok tesem balala asem nung mobile phone handset aser digital watch den sendaktepa aliba Improvised Explosive Devices aika ngutetogo.

Manipur nung assembly elections atongtsü lia state nung telungpurtem inyaksangshi tali kümogo aser ketdangsurtemi lendong keta aliba tesemtem nung tali kümüküma alitsü atema security forces nem tetuyuba agütsüogo.

Assam: Dhekiajuli nung kibong 550 dang ali azüngtettsütsü tuyu

Guwahati, Yimpoksüi/November 18 (Agencies): Sonitpur district administration-i Bodhbarnü Dhekiajuli nung ozüing alema ali atsünger aliba kibong 550 dang anogo 30 tsüingda parnok talidak azüngtettsütsü tuyuogo. Iba tetuyuba ya Dhekiajuli kübok Nisolamari aser Bosasimolu yimtsüing nung alirtem nem agütsüogo.

Dhekiajuli circle office nungi ketdangsur kati ashiba agi, "ali atsünga alirtem nem anogo 30 mapang agütsüogo. Osang agütsüba sülen kibong kari parnok ali toktsütsü telemtetba agiogo. Parnok nem tetuyuba agütsütsü aser parnoki ozüing alema atsünger aliba ali toktsütsü imlar."

Kasa mapang nung iba tesem nung alirtemi parnok iba tesem toktsür mao tsüingda teyari agütsütsü khangogo. Parnokisa sorkar dang alu arutsü mapang asünung mapang tatsüka atatsü mepeshia asüngdangogo.

Nisolamari nung alir Muktar Hussain-i, "iba tesem nung alirtemi sorkar facility balala agia arudar. Sorkari idaki kibongtem nem ration

card agütsüogo. Orunodoi scheme kübok tettsürtem nema senotsü teyari agütsüogo. Iba tesem nung sorkar school aser primary health centre tem amenoka lir. Tang ali toktsür aotsü tetuyuba agütsüba ni angateter," ta ashi. Maneni pai sorkar dang aluyimba dak metaloker alirtem aser angopurtem atema süoki ia bilemstü aser parnok nem tama teyari agütsütsü mepeshia liasü.

State sorkari September ita mezüingbuba Assam, Darrang district kübok Dholpur nung ozüing alema ali atsünger alirtem mintok tenzük. Iba sentong benoka inyakba mapang azütokshi lendong tulu ataloka police temi injang akhaba mapang civilian ana tepset.

Iba ita tetenzüklen Hojai district administration-ia Lumding reserve forest atsünger aliba ali hectares 1000 dak tema azüngtettsüogo. Kibong 500 shi iba tesem nungi anina liasü. Hojai police-i Mongolbarnü iba tesem nung kibong den lidaktsür nisung ana puogo. Bodhbarnü local court kati tena anogo 10 atema police ket nung ayutsü tetuyuba agütsüogo.

Mizoram: Kaketshir 118 aser tesayurtem dak Covid-19 putet

Aizawl, Yimpoksüi/November 18 (Agencies): Aizawl nung private school ka nungi kaketshir 118 aser tsayurtem densema nisung 570 dak coronavirus tashidak puteta state nung iba tashidak menar 1,30,415 jungogo, ta ketdangsurtemi Brehostibarnü metetdaktsü.

State information and public relations department sangdong ka ajanga ashiba agi, taoba ghonda 24 tsüingda Covid tashidak agi nisung ka danga masü aser tang tashi nung asür 467 dang lir. Iba department yagi anogoshia COVID-19 tashidak putetba data asadanga alir.

Brehostibarnü tashidak puteter parnok 570 rongnungi Aizawl district nung nisung 321, Lunglei district nung nisung 52, Champhai district nung nisung 41, Serchhip district nung 37, Kolasib district nung 26, Mamit districts nung 25, Hnahthial district nung 21, Khawzawl district nung 18, Lawngtlai district nung 14, Siaha

district nung 9 aser Saitual district nung nisung 6 lir, ta kasa sangdong ajanga metetdaktsü.

Yashi single-day positivity rate 8.87 per cent aliba Brehostibarnü 13.26 per cent kümogo.

Mizoram nung tang tashidak menar nisung 5,616 temang anepaludar. Kasa mapang nung Brehostibarnü nisung 344 taneptsü anguba sülen taneptsü angur ajak senteper nisung 1,24,332 jungogo.

COVID-19 agi shirangertem rongnung recovery rate ji 95.33 per cent aser death rate 0.35 per cent lir.

Mizoram nung tang tashi nung COVID-19 atema sample lakh 13.88 tendangogo aser Bodhbarnü sample 4,298 tendanga liasü.

Tang tashi nung nisung lakh 7 dak tema nem vaccine agütsüogo aser parnok rongnung lakh 5.43 nembo Bodhbarnü tashi nung tanabuba dose dena agütsüogo, ta state immunization officer Dr. Lalzawmi-iashi.

GOVERNMENT OF NAGALAND
OFFICE OF THE CHIEF ENGINEER, WATER RESOURCES DEPARTMENT
NAGALAND: KOHIMA
ADVERTISEMENT

Eligible candidates are invited for Walk-in-Interview for filling up the following vacancy under the scheme National Hydrology Project (NHP) funded by World Bank under Water Resources Department, Nagaland, Kohima on contractual basis for a period of one year and flexible for extension thereafter.

Sl No	Name of the Post	No. Of Posts	Qualification	Emolument per month	Scheme
1	IT Expert	One(01)	Minimum Qualifications: Bachelor's Degree in Computer Science, Information Technology or related field is preferable.	35000	National Hydrology Project

Requirements:

- * Strong analytical, diagnostic and problem-solving skills.
- * Good Communication ability, both written and verbal.
- * Personable, professional demeanour

NOTE:

- * The IT Expert shall be appointed for one year starting from the date of his/her appointment. The contract may be extended for another year after the successful assessment by the review committee.
- * Candidates must submit self attested photo copies of the following documents:
Admit card of HSLC for age proof, ST, Indigenous Certificate, No objection Certificate from HOD for those already in service, Educational Certificate along with marksheets from HSLC onwards with 1 passport Photo.
- * Application form may be collected from the office of the Chief Engineer, Water Resources Department, Nagaland, Kohima on any working day w.e.f 20th Nov, 2021.
- * No individual call letter shall be issued.
- * The last date for submission of application form is 23rd Nov, 2021 till 3:00 P.M.
- * List of qualified candidates to appear the interview will be put up in the Office Notice Board on 23rd Nov, 2021 and the date of interview will be on 24th Nov, 2021.

Sd/-
(Er. RAZOUVOLIE KELIO)
Addl. Chief Engineer
Water Resources Department
Kohima, Nagaland.

Issued by DIPR



TIR YIMYIM YIMOBILEM (EDITORIAL)

DIMAPUR ROGONÜ, YIMPOKSÜ (NOVEMBER) 19, 2021

Politics tali mejembali

Nagaland nung Naga nungertemi politics tali jembiba agi rongsenren tsütsü temulung magütsür aser iba jagi sensaker, anungji politics nung masü rongsen renlokdahtsüba nung temulung agütsütsüla ta tan hopta nungsa senden balala nung jembidang, taoba Nagaland Chief minister Wb.Dr.S.C.Jamir aser tang teinyakdak Chief minister, Wb.Neiphu Rio na pronglai metetdaksü o ji Nagaland shirangba tashidak ka puteta taneptsü mözü agütsür amai lir. Yimten mapa aser yimten telok balala indang tajung-majung jembiba ajakji politics lir. Aji oda, yimten yimsüsürtem shimtsü asoshi election agiba, tanishir asütsü toktepbä, yimten tashi tuluba angutsü merangba, yimten nung ka tutsütsü aser ka lutsütsü asoshi inyakbatem ajakji politics lir. Atangji, politics ya tamajung aser tamagitsü ta masü saka tajung aser tongtibang, kechiyong politics agidang yimten tashi amtsü, anungji linük nung temzüng ozüng latettsü aser nübertem asoshi telemtetba agitsü. Iba jagi, nisung aikati yimten (politics) nung shilem agitsü jangrar. Ajisüaka, kidang chiyongtsübo maka saka aluyimtsü melen party mapa nung dang election indang dang jembia jajara, kibongji kechi akümtsü ? Pei lima nung züsenteta aser yangluteta ayoktsüsa kecha maka; chiyongtsü, süoshi aser nungdak osettem ajak tangari züsentetba aser tangari yangluba alia agir, saka asenok rongnung takartem rongsen ajak election (electoral politics) nung dang endoker. Aji oda, takar makar aser tulur tilar ajaki pei teka agi langkabo züsentettsü mesüra langkabo yanglutettsü ta bilema inyaker masü, taküm piyong yimten ajung majung indang aser party aser candidate indang dang jembia aliba agi asenoki memeteti asenoksasa asenok yimten nung alar akümer, kechiyong yimten nung shilem agiaka rongsen makaba agi tangar dang meshimetsüa alitsüsa akümer. Shitakba agi politics ajanga nübertem nem rongsen angutsüba lenmang sayua yimsüsürtemi yaritsüla. Aji oda, asen akhi tsürabur yimten yimsüsübaren nunga yimteni dang kolen yimkong tzübo mesemtsü aser kong koba lu achitsü ta alu pok shimteta yimsüsürtem dena yimkong iba tzübo nung jagi ajemtsü aser iba luji ayimtsü. Tetezü, rongsen bushiba aser renlokdahtsüba maparen ajak yimten tashi nung dang inyaker, anungji nübertemjibo yutsür, putu yimsüsürtema anogo shia alui mao, kecha meinyak yimten (politics) indang kisüng jembia amongtsüsabo nungdak madoker. Yimsüsürtemji yimten o dang jembia taküm alitsüba masü mesüra yimsüsürbo yimten o agidang kibonga mesütsü ta masü, shiba südir sang, yimsüsürtema aser nübertema pei teka agi inyaketba rongsen agi pei taküm aser kibong taküm alitsü. Tanü asenoki yimten nung shilem agiba ya kecha meinyaki takar akümtsü asoshi bilema inyaker. Ibayongji, yimsüsütsü metenzükdangyongi langka nungi mesüra langka nungibosa mesükzuka pei nungdak peritsü merangdang ochimashi nung amendaker mapa tenzüker. Iba kasa tangatetba nung yimten telok balala nung inyaker tema, mapabo kecha mali ser nung, taküm piyong party nungdak jajaba agi kidang tzünglu asentsüsa akümer. Shitakba agibo, tanü putu nungbo yimten o jembia jajara yimten nisungtem meyong alu mesüra industry-ang tuluba akatsü tim, kechiyong item nung jagi züsentetba agidang nübertem mesütsü. Iba amaji nübertema o lu aser election lu dang meyimi, shitakba chiyongtsü aser senotsü ajangzükteba mapa ka mesüra kabosa inyaka taküm alitsü tim. Aji oda, lanurtema tema aser telong politics nung dang temulung magütsü alu tapu balala ayimba, factory tapu balala lapoka osettsüset yangluba aser business lenmang tapu balala bushia sen aatsüba mapatem angazüka tenzütsüla. Atangji, senso tajung ka ama nisung shiai pei angatetba yari yimten nung shilem agitsü tim, anungji senso shiaji political party ka nungbosa adentsüla aser election nunga pei vote kaji kanga senti ta bilema vote enoktsüi aotsüla. Aji oda, pei meyong vote tayoka mayoktsüla aser tangar nema meinokdahtsütsüla saka timtem agia asüyonga peisasa orr pei vote peii enoktsü tim. Ibaijang asen alu mapa nung tamakok maludaktsüi yimten nung shilem agiba mapa ka asütsü. Election mapanga politics jembia kecha meinyaki amongtsü menügdaker. Aji oda, vote agütsünua vote agütsürbo pei mapai aotsüla. Yimtenji rongsen madak kibur amai, kechiyong rongsenji yimsüsürtemi alemer. Ajisüaka, tang asen lima nung amai, rongsen lemstüdi asüyonga mekara kechi lemstütsü ? Rongsen mekara yimsüa mesütettsü aser yimten nung rongrongang tulu adoktsü. Ibai angateta, asenokbo politics tali jembiba aser election lu ayimba shisa makaba mapatem toktsür, shitakba asen keti rongsen agir magima arutsüsa asenokbo rongsen züintsüba indang angazüka inyakdi.

OLEMSABANG

MOLUNGYIMSEN ASÜ SHIRI TAMASHI MAPA INYAKER ?

Lima Tzüdir, Dimapur

Naga lima nung mezüng Khristar Arogo tenzüka otsü atema taoba mapang küm aika atsütepa arur ABAM-i zülua aliba kulitem (documents) balala bushitepa shisadanga repringba sülen 1986 küm telemtetba ka agi aser ibaji tamendakdak ser lia aruogo.

Ajisüaka, tang teinyakdakpur ABAM Sanen Luden-i Arogo tenzüka otsü atema lemte ka agishiba aser iba nungji ajemdaker Executive Secretary Tsüngremi o jembii meyoktsü lemteba ya shibai mesüra shirnoki ABAM ya anisar ta kanga rataa bilema lia aser ABAM nungi telangzuba ka angutsü imlaa aliba mapang ka nung Tir Yimyim Yimpoksüi (November) 15 aser 16, 2021 adok ana nung "ABAM SANEN LUDEN TELEMTEBÄ MEYIPA AGITSÜ MADOKER" ta ser ocet ka züluba züngshia shiri inyaker'ar jangaogo.

Atangji Arogo ka Jubilee aser Centenary amongbaji Tsüngrem nem tenüngsang agüja aser Pa dang nungi temoatsü meshia amongba benjung ka sernung, asen Aor tamanger karbo kodaser mepetmesü/mangatetep adokdahtsütsü ta ang bilema telung nung miima inyaksangshiba angudang kanga aoksar aser iba ya kanga dang tamashi mapa ka ta sasa bilemstür.

"ABAM SANEN LUDEN TELEMTEBÄ MEYIPA AGITSÜ MADOKER" ocet nungsa ABAM 1986 Resolution No. 40 nung tashimaitba ajiteter ta ser onük kar agütsüogo. Süra, iba mapangji Molungkimong nung Arogo tenzükerter aser yimertem kechi repringa liasü? Kodaser küm 35 lir ang tashimait lir ta ajiteter? Iba yaa tamashi mapa ka masü na ta asüngdang.

1981 nung ABAM Special Committee ka shima Naga lima nung Arogo tenzüka otsü bushitepa osang agütsütsü mapa nungloktsü aser parnoki küm pungu tashi zülua aliba kulitem (documents) aser manuscripts bushitepa asadanga sülen 1986 ABAM Küm Tatem Mungdang nem osang agütsüba agizüka ayu aser iba jagi dang 1986 ABAM Resolution ta tetshir. Saka ocet züluri 1986 matongdang 1960 Ao Arogo Anogo Special Committee Report, Join Research Committee 1977 (ABAM & Molungkimong) aser ano ABAM 1980 Special Committee tem ajanga agütsüba osangtem zülusema nübertem ratadaktsütsü merangba ajiteter aser iba ya-a tamashi mapa ka lir.

Arogo tenzüka otsü atema kanga atsütepa arudang item Committee balala shima otsü bushitep saka parnoki bushiteta agütsüba osangtem jagi mabensaba agi dang 1981 küm ABAM Special Committee ji tentetba liasü aser iba sülenbo ABAM-i Naga lima nung mezüng Arogo tenzüka otsü bushitsü atema Committee khen danga tenteta mali, aser iba tetezüji tang tashi nungbo iba otsü ya 1986 ABAM Resolution nungji tembanga lir. Anungji, küm 35 süir ang tanü 1986 ABAM Resolution nung tai apuba yabo kangasa tamashi mapa ka lir.

Ocet zülurisa 1919 küm Molungyimsen nungter tesayur aser pastor Repalemba-i Molungyimjen (Molungkimong) nung arogo tenzüksütsüba aser 1940 nung pastor David-i ABAM nem arogo osang agütsüba aija zülugo, saka Repalemba aser David na inyakba mapang arogo tenzükerter aser arogopurtemji Molungyimsen nungter masü saka Molungkimong nungersa liasü südi. Anungji tenai Tsüngrem wadang nung bendanga agüja inyakba nung tanü tarak kettsür süra, tena inyakba mapang arogo tenzükerter aser arogopurtema dak-a kasa tarak kettsür aser ibajia kanga dang tamashi mapa ka lir.

Ocet zülurisa ABAM 1986 Resolution dak tashimait ajitetaka iba bangzüng nenshia lir. "Arogo otsü maparen dak sendakba nungi adokba ken O case ama Mungdang mesüra kija arogo shingaia mejembitsü, nungdakra zülua aliba kuli (document) bushiteptsü akok."

"Committee-i osang bener aruba ama Mungdangi agizüka ayu, aser iba ken-o nung Mungdangi kecha shilem (responsible) magitsü ta lemte."

Anungji ABAM-i lateta aliba amaji iba Resolution aitsütsüsa mesüra melenshitsüsa zülua aliba kuli (document) kar danga nguteta lira, yimjak nung metetdaksüba den ABAM ket tongtsütsüla sernung, ABAM TEMZÜNG (Revised 2016) aser ABAM NÜKLA 2030 (2016) Jili O nung ajemdaker ABAM 1986 Resolution aitsüba yabo kangasa tamashi mapa ka lir.

Molungyimsen-i tambu rakteper ta tai tonglokja jembiba angashir saka iba ya tambu rakteperba masü saka zülua aliba kulitem (documents) aser manuscripts balala nung ajemdaker December 23, 1872 (tang Dec 22, 1872 ta melena amshir) nung Dekha Haimong (Molungyimjen/Molungkimong) nung tenzüka arogoji tanü Molungyimsen nung aliba Arogo yaa ta jangjatsürba dang lir.

Ibaji ochiji metentsü atema kuli aika dang lir aser mangur nem-a Molungyimsen-i agüja züngdahtsütsü molunga lir, kechiyong ABAM ket nung aliba aser ano Nagaland nung dang masü saka tangalen aliba kaketnang balala nung Naga lima nung mezüng Arogo tenzüka otsü dak sendakba zülua aliba kuli (document) aser kaketnem nung tapak aika shitoka endokogo ta osang angashir. Shir kati koba mapang tapaktemji shitok'ar memetet saka ibajia kangasa tamashi mapa ka ati.

Tatensa Molungkimong Students Union Golden Jubilee (1946-1996) kaket nungi tebilemdangtsü onük kar lemsateper:

1. 1950 küm Ao Mungdangi oa 1952 küm Ao Mungdang ajatsü jembir aru. (Tapak 26)
2. 1920 yimtsüng nung mezüngbuba tasü mang süngden yanglur aremba - Mr. Repalembai par chir Samuel temang rema liasü. (Tapak 59)
3. 1921 Mr. Repalemba Pastor asüba mapang mezüngbuba sati kuli tajung agia ki ayimba. Mr Yarinuken aser Miss. Imodangla na liasü. (Tapak 59)

Dr. E.W Clark-i December 23, 1872 (Dec. 22, 1872) nü Molungkimong nung Naga lima nung mezüngbuba arogo tenzüka nungi 1919 tashi khen danga metangdangi aru ta ashir süra, March 1897 nung Molungyimsen nung Ao Khristan Mungdang (Ao Naga Baptist Arogo Mungdang) tenteter 1919 tashi nung yim balala nung Mungdang monga aruba nung Molungkimong nung amongba zülua mali. Kodaser 1952 nung ang Molungkimong nung mezüng atema Ao Mungdang among?

1897 küm Molungyimsen nung Ao Khristan Mungdang mezüng sentepa amongdang Molungkimong arogo adenba kecha nunga zülusema mali. Iba Mungdang nung adenertemi telemtetba tongtipang pungu agi aser item rongnung tasü mang ali tur aremstüba liasü. Mungdang senshir anogo pezübuba March 18, 1897 nü Pastor Aokilep'er jabaso Peter asü aser Mungdang nung lemteba ama Dr Clark-i tasü mang süngden yanglua Peter mang enoker ali nung arem. Iba ya Naga lima nung mezüngbuba Khristan mangrem liasü. Süra, kechiba Molungkimong nungbo 1920 nung ang Khristan inyakyim nung mezüngbuba mang arem?

1872 nungi 1919 tashiji khen danga metangdangi aruba arogo ka süra 1921 nung ang kodaser mezüngbuba kiyimba kulizüng agi? Kechiyong Molungyimsen nungbo 4th April, 1878 nung Assamese nungter Baptist Missionary Hudhon aser Nagatsür Noksangla na mezüng Khristan kiyimba kulizüng agiba jangjajangja zülua lir aser ibaji Naga lima nung mezüngbuba Khristan kiyimba kulizüng agiba lir.

Rev. Dr. E.W Clark aser pa den külemi inyaker mezüng missionary temi Molungkimong nung 1872 küm tenzüka arogo metangdangi aliba indang zülusema yutsüba document mesüra manuscript kecha nung mangur.

Ano, October 24, 1876 nung Molungyimsen yim akümdang Dr. Clark-i Molungkimong nung pastor/ arogo incharge inyaktsü atema nübo shima yutsüba kuli kecha mali.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Christ King Parish Kohima-i music video 'Thenupfü Rülü' sayaogo



Kohima, Yimpoksüi/ November 18 (TYO): Kohima nung aliba Christ King Church Parish indang social communication wing- Catholic Youth Association (CYA)-i minute 4:58 indang music video 'Thenupfü Rülü' sayaogo; iba video ya Don Bosco Global Youth Film Festival (DBGYFF) atema shima lir aser tanü (November 18) nungi tenzuka Hokolbar tashi nung linük 135 nung iba video sayar.

Lanurtem indang Don Bosco Global Youth Film Festival (DBGYFF) ya Rome nung headquarters aliba Social Media Department of the Salesian congregation (Don Bosco Society)-i "Moved by Hope" omen nung ajemdaker ayongzük.

Tanü Church King Church, Kohima nung iba music video sayatsü jakdang tetushi tejaoker Principal Secretary to Chief Minister, Power & Information Technology & Communication, K D Vizo-i, Arogoi iba music video alima tesem ajaklen sayatetba ya Arogo atema tepelatsü aser nümadangtsü ka

lir, ta ashi.

Iba music video atema inyakertem nem tenüsang agüja pai, iba sentong atema omen ya jangratemtsüka lir, kechiyong coronavirus wara ajanga tang alima nung tejashi aser tetsübu aliba mapang nung iba omen ajanga teimla agütstür, ta ashi.

Paisa, tang lanurtemi ajangshiba tayongzükbatem ya khenyongi balaka lir, kechiyong taintemia ibaji mangateter, ta ashi.

Iba dak sendakba nung pai, lanurtemi metsübuttsüla kechiyong alima nung teimla lir, anungji terata jenti aliba tensa ka nunga lanurtemi nukjidong yur züngkanga alitsüla, ta ayongzük.

DBGYFF-i arrshi küm 18-30 tsüngdapurtem nem maongka agütsüogo ta shia pai, tang iba mapang ya taküm nung kanga tongtibang mapang ka lir, anungji lanurtemi tetezü keta taküm alitsüla, ta ashi.

'Thenupfü Rülü' tetezü Tenyidie oshi nung 'tetsü ka timtem' lir.

Alima nung linük 114 nungi entries 1668 agütsüba nung screening asütsü atema entries 110 dang shimtetba rongnung iba music video densema lir.

Iba music video zülusang, Seluovinuo Rame-i, iba music video ya tetsü kati la kinüngbu shirangba anepaluba den külemi lar tanurtem anepaluba mapang timtem balala ajangshiba indang otsü lir, ta ashi.

Rame-isa, "Lai la lanur mapang bilemteter aser tanaben lanur ama liner, ajisüaka lai lar chirnurtem meimba aser tang la khurettem abentsü aliba rateter. Tetsü kati tajung anogotem imlar aser la khurettem pelaseta abener," ta metetdaksü.

Iba music video ya Nagaland nung October ita nung tangok aser shilem agirtem ajak senteper 20 liasü. Music video ya Albert Seluokuolie Rutsa-i direct asü.

Brihostibarnü Kohima nung Thenupfü Rülü densema video tatsü 16 saya aser maneni Hokolbarnü tashi nübunur ajak atema, talisa kaketshirtem atema sayatsü.

ANOGO ABEN TSÜNGREM DEN

Meshitettsü aser yok

Ochi nung parnok meshitetjang: Ne O ochi lir. Nai kechi koda alimai ni yok, yamaji Nia parnok alimai yoker. Yohan 17:17-18.

Tsüngremi teti na meyokdang tama meshitettsür. Tebui nütsüng tera ana shimtet aser temeshi ochi, Pa jabaso ajanga meshitettsü. Parnok Yisu den sendaktepa ali nung ochi agi (Yn. 14:6) nütsüngtemi ochi ajanga aser osangtajung sayutsüngitsü asoshi renemtsü. Yisui parnok tejangraba jazük (challenge) (Luke 9:46-48), parnok tamang ilaba indang ashi (Matt. 17:19-20), Satan arutsü (Matt. 16:23), aser parnok asükümba aitsü (Matt. 26:33-35). Kodang Yisui parnok renemtsüba atema alimaji aki ama malitsü saka melenshidaktsütsü ain agütsür Pai parnok alimai yok. Temeneni Tsüngrem tsüngdang na tamakitsü kümdaktsür ta Satani puatsü akok. Tiyazü tulu nungi ibaji tiyazü aruba asütsü. Nai temenen menali Tashioktsübai "Nai tamakok nguogo. Na tang joko Tsüngrem tsüngdang takidak maka" ta ashitsü. Iba yagi Khristan ka dangi tamakokji tali shisanga aser tali teyimla makaba kümdaktsütsü. Aji saka, Tsüngrem tanela ka nüji kümdaktsüba kecha dena medemdangtsü makok. Kodang Tsüngremer nüburi Tsüngremer ochibaji Tsüngrem mulungba nung ayutsü mulungtetdir, idangji Tsüngrem ainji mezüng nütsüngtem nem agütsüba ama parnok ajanga kasa yoktsü.

Ochibai na nüji kümdaktsütsü. Ochiji "Asenoki asen temenen nangzükra, asenok dang asen temenen adoktsü aser memeshiba ajak nungi asenok merükdaktsütsü, Pa temulung lemtetba aser ochi lir" (1 Yn. 1:9), aser asenok Tsüngrem asoshi alitsü agizüker.

Laishiba nung shia aliba 'Hanukkah' benjung indang kuli angu



November 18, 2021: Israel nung archaeologist temi Yihuda nung Greek nung yimsüsürtem madak takok anguba aser meshitetba benjung- 'Hanukkah' amongba indang kuli nguogo.

Meshitetba benjung- Hanukkah indang ya Tejen Laishiba nungbo shia mali, ajisüaka Tasen Lai nungbo Yohan 10:22-23 nung shia lir.

Küm 2,000 tejaklen tenemlen aliba mitsa ka liasü, aser iba

mitsaji Greek nungeri yimsüsüba Maresha yimi Yihuda nung matsüngdang nungi kümzüksü atema yangluba liasü ta jembia aru, ajisüaka Lachish Forest nungji Israel Antiquities Authority nungi archaeologist temibo iba kuiji mangu.

Parnoki ashiba agi, Hasmonean Yihuda nungeri Seleucid Greek nungeri yimsüsürtem madak takok anguba dang Maccabees ta

ajar.

"Onoki yangi bushitetba kuli ajanga Hanukkah otsü aser Hasmonean Yihuda nungeri Greek nung anema raraba jangjar," ta Excavation Director, Achinoam Montagu-i metetdaksü.

Parnoki ali tua bushiba mapang nung süklep 50X50 mitsa ka raksar aliba angu. Montagu-i ashiba agi, iba kiojen jara tasazükji süklep 10 shi liasü, aser ibaji tsükchirtem nokdangtsü atema yangluba liasü.

"Onokisa ali chipo, senjang aser raraba hadir densema oset 400 shi angu, aser ibaji second century BC mapang nung amshiba asütsü," ta Montagu-i metetdaksü.

"112 BC mapang nung Idumea atsünga agiba dak sendakba nung iba kiojenji Hasmoneans nungertemi raksatsü," ta pai metetdaksü.

Akhidang iba tesem dangji Idumea ta jaa liasü aser iba nungja ya Laishiba nung aliba tenüng Edom nungi jateta liasü.

Iba kiojenji metong nung süklep 17 shi liasü aser takdang tenet den ki tamentepi atuba lenmanga liasü.

"Kiojen raksatsüba janaji metre tesadang shi temelem liasü aser tsüngbang chirepa aluba jana-a liasü. Tsüngbang chirep aser tsüngbang chirepa jana-ma nungji jara aser kiojen chirepba jana liasü. Ali tua bushiba mapang nung onoki lung aika agitetba sülen ang kiojen raksaba janaji tutet," ta pai metetdaksü.

Hasmonean Yihuda nungeri ya Maccabee kibong nungi jakzük aser parnoki Greek-Seleucid yimsüsürtem indang süngyanglu külemba anema nokdaka liasü.

Greek nung anema apusoba mapang nung Yihuda nungeri Yirusalem nung tenla ki merüktet aser totzü peria ngua anogo 8 tashi arong; ibayongji parnoki anogo 8 nü Hanukkah amonger.

Temple Mount nungi mile 40 shi pilar aliba tesem nung Hasmoneans nungeri takok

angu. Temple Mount indang ya Laishiba nung Mica 1.4 nung shia lir.

"Yihuda nungeri Greek nung anema nokdakba otsütem onoki meteta lir, aser iba kuli anguba ya tang tetenzüker dang," ta Montagu-i ashi.

Iba tesem nungji mori chipo, süoshi arrtsü atema yongmen yin agi yangluba oset, senjang aser noklangnok tejaksa ka densema angu.

Ali tua bushisüngdangba maparen nung archaeologist tem den yariteper school kaketshirtemia aika angazükdar; parnok mezüng aruba mapang nungbo parnoki kechi mapa inyakerar memeteti liasü saka tangbo parnoki aika angazükdar, ta Montagu-i metetdaksü.

Iba tesem ya tarutsü nung public atema lapoktsütsü, aser iba tesem semdangba ajanga nisung aikati küm 2000 ana tejaklen tatalokba puti otsü ajangshitsü, ta mongintemi metetdaksü.

OLONG PAITEP # 6001

1				2				3		4
5		6								
							7			
8										
										9
		10								
				12						13
14										
							15			
16										

TIPLÉN		LANGTSÜNGLEN	
2. Auo nung chiyongtsü asenba	- (7)	1. Lenmang	- (7)
5. Mangyimba mapang	- (5)	2. Aor kidong ka tenüng	- (6)
7. O tamendakdak	- (4)	3. Tenarong maten	- (6)
8. Pei dak malangba	- (7)	4. A _ _ _ g	- (3)
10. Juli	- (7)	6. Mopung apodoka	- (3)
12. Sen ayudak	- (7)	9. Tongtipang tagitsü	- (7)
14. Tenük agi ajitet	- (4)	10. Menungra bilem	- (6)
15. Tamajung aküm	- (5)	11. Aiür	- (6)
16. Apuso	- (7)	13. S _ _ _ k	- (3)
		14. T _ _ _ r	- (3)

OLONG PAITEP # 6000 TELANGZÜBA

TIPLÉN :		LANGTSÜNGLEN :	
1. Yiar, 3. Tesola, 7. Yimra,		1. Yimti, 2. Amen, 4. Shiner, 5. Alaka,	
8. Tangar, 9. Peria, 10. Tanur,		6. Satan, 9. Putet, 10. Tembar,	
11. Tasen, 13. Lemjem, 15. Tambu,		11. Tatok, 12. Amang, 14. Jala.	
16. Khuret, 17. Sang.			



ALOKBA BALAR KÜLEN

Sobangba : Temba, na tantsü den balar külen komasa lidar, timtem aikasa ajuruya lidi?

Alokba : Waa, tang kanga agi tajungba ati.

Sobangba : Yamaji no?

Alokba : Aito, mebaladangbo künaprongla süoshi ni ashitsü, sorojiok ni asütsü, kechisarna ajak ni dang nisung ana atema inyakji, tangbo kü kija atema inyakerji kanga arram ati.

Sobangba : Achhaa.

Lilir : WhatsApp

TANÜBO NAI LANGZÜANG

Q. Koba linük ajanga India den 'Parliamentary Friendship Association' tentet?
 [A] Sri Lanka [B] Nepal [C] Bangladesh [D] Japan

(Taruba adok nung onoki langzüsü)

YASHI ADOK TELANGZÜBA: Ministry of Electronics and IT

AO OSHI ANGAZÜKDAK:
TANÜ ANGAZÜKTSÜBA OJANG

Leplu
 (n) tashikang keter kidang chiyongtsü chitsüa ayazüba takümsangnu (cockroach)
 * Kidang **leplui** chiyongtsü memenentsütsü atema teti küpbanger ayutsüla.

Lepma
 (v) kasasa ana küma lepdang (cut into two equal parts)
 * Odilai mapu tuluka ana küma lepma aser küna kaka agi.

NAI-A YA METETTER MA

* ICC T20 WORLD CUP ASAYAMUNG NUNG RUN TIMBA YANGLUR ASER WICKET AGIRTEM:

* **MOST RUNS**

- 1) Babar Azam (Pakistan) - 303 runs @ 60.60 in 6 innings
- 2) David Warner (Australia) - 289 runs @ 48.16 in 7 innings
- 3) Mohammad Rizwan (Pakistan) - 281 runs @ 70.25 in 6 innings
- 4) Jos Buttler (England) - 269 runs @ 89.66 in 6 innings
- 5) Charith Asalanka (Sri Lanka) - 231 runs @ 46.20 in 6 innings

* **MOST WICKETS**

- 1) Wanindu Hasaranga (Sri Lanka) - 16 wickets @ 9.75 in 8 innings
- 2) Adam Zampa (Australia) - 13 wickets @ 12.07 in 7 innings
- 3) Trent Boult (New Zealand) - 13 wickets @ 13.30 in 7 innings
- 4) Shakib al Hasan (Bangladesh) - 11 wickets @ 11.18 in 6 innings
- 5) Josh Hazlewood (Australia) - 11 wickets @ 15.90 in 7 innings

* **HIGHEST SCORES**

- 1) Jos Buttler - 101* vs SL
- 2) Rassie van der Dussen - 94* vs England
- 3) Martin Guptill - 93 vs Scotland

* **BEST BOWLING IN AN INNINGS**

- 1) Adam Zampa - 5/19 vs Bangladesh
- 2) Mujeeb ur Rahman - 5/20 vs Scotland
- 3) Adil Rashid - 4/2 vs West Indies

SUDOKU # 6042 **TELANGZUBA # 6041**

		2	5		6			9	2	6	5	1	4	8	9	3	7
4	9	7						5	1						7	8	9
	5			9		3		8	3	1	4	9	7	2	6	5	8
	1	3			2	9			1	9	3	4	5	7	8	6	2
9		4		5		2	6	3	5	4	7	8	2	6	3	9	1
			7			8		4	8	2	6	3	9	1	7	4	5
	3	5		8	1	4			4	3	2	7	1	9	5	8	6
2			9			1	3	7	6	5	8	2	3	4	1	7	9
	6				4		8	2	9	7	1	6	8	5	4	2	3

OJANG LUTEP # 5588

KTLOI :

KLETEJANI :

SÜAOT :

EMATA :

AKAJ :

ALITAMEPA :

KTINYASÜ :

NGKAA :

NGDA :


TOTIBNGANG :

OJANG LUTEP TELANGZÜBA # 5587

TAJUNG DANG JUNGER TA SHITETTSUSA MEIMCHIR
 TAKÜMJI ALITSÜ KANGA NUNGDAKER

TAN HOPTA ATEMA - KOMA SÜLA ?

Q. Nagaland government-i bilemba ama, Nagaland nung Municipal aser Town Council-tem ya election magii dang tentet nunga koma süla ?



November 18, 2021 nü Bhopal nung Madhya Pradesh State Congress Tir aser taoba mapang Madhya Pradesh Chief Minister, Kamal Nath sor küm 75 ajungba anogomong sentong nung party nung inyakerteri pa nem lasang ka sempet agütsüba noksa nung angur.

China-i yim pezütentetba atema PM Modi-i ola madoker: Congress

New Delhi, November 18 (Agencies): Brihostibarnü Congress Party-i, BJP-i aniba sorkari linük security aser India nungler litsü kümzüka ayutsü atema meinyaker, aser Doklam plateau anasa China-i yimtsüng tasen tentetba atema Ato kilonser, Narendra Modi-i ola madoker, ta aitsü.

Congress party otongdar, Gourav Vallabh-i, tang satellite noksa tasentiba ajanga Doklam anasa Bhutan nung China-i yim tasen pezü tentetba sayur aser ozüing alema iba tesem nungji ali square kilometres 100 agiogo, ta metetdaksü.

New Delhi nung osangbenertem den jembidang pai, "China-i lenla ajaklen nungi ambangyima inyakba atema kechiba asenoki odang yutsür? Onoki Ato kilonser dang atsüka malitsü saka nüburtem nem telangzüba agütsüsü mepishir," ta metetdaksü.

"Modi sorkar dang tai

metoktetsü, kechiyong parnoki linük security aser litsü kümzüka ayutsü atema meinyaker. Asen sepaitemi China nungeri ambangyima inyakba anema tasütait tanela nung raraa taküm tenla agütsür saka Ato kilonser aser defence minister nati asen sepaitem tashi mezüingshir," ta Vallabh-i ashi.

Congress general secretary aser otongdar tongti, Randeep Surjewala-ia twitter ajanga satellite noksatem sayua yamai ashi, "Ali Square kilometer 100 rakzükdaktsüogo aser ozüing alema arrtsü adena aita China-i Doklam anasa Bhutan nung yim pezü tentetogo. Iba ya India nungler security anema inyakba lir. Iba ya 2021 küm May-November tsüingda atalok," ta metetdaksü.

"Kechiba Ato kilonseri ola madoker? Shibai linük security atema nokdaktsü?" ta pai asüingdang.

China nunger yimtsüng

tasentemji Doklam plateau anasa lir; 2017 küm iba tesem nung India aser China sepaitem raraa liasü, ta paisa metetdaksü.

Vallabh-i, Bhutan li nung China-i kiojen tasen yangluba ya India atema shisabulutsü onük ka lir, kechiyong akhidang nungi India-i Bhutan den tezüingzüktep kar yanglua lir aser tang tashi India-i Bhutan sepaitem nem training agütsür, ta metetdaksü.

Congress lenirisa, "Asen tasütait sepaitemi taküm tenla agütsüba kechiba Modi sorkari mezüingmeshir? China-i ambangyima inyakba anema kodang Modi sorkari telangzüba agütsüsü," ta asüingdang.

Paisa Ato kilonser dang, nai kodang linük nüburtem nem telangzüba agütsüsü, nai kodang 'China' ta tetshitsü aser China-i arrtsü nung ambangyima inyakba anema kodang nokdaktsü?, ta asüingdang.

November 29 nungi asükwa mongpu Parliament tenzüksü

New Delhi, Yimpoksüi/ November 18 (Agencies): Asükwa mongpu Parliament November 29 nü tenzüksü aser December 23 nü tembangtsü, ta Brihostibarnü Parliament nung inyaker ketdangser kati metetdaksü.

Brihostibarnü Lok Sabha Secretariat-i sangdong ka ajanga, "17buba Lok Saba tenetbuba session Hombarnü, November 29 nü tenzüksü. Iba senden ya Brihostibar, December 23, 2021 nü tembangtsüa akok," ta metetdaksü.

"Tiri Hombar, November 29, 2021 nungi New Delhi nung Rajya Sabha senden ayongzüko. Iba senden ya Brihostibar, December 23, 2021 nü tembangtsüa akok," ta kasa sangdong ajanga metetdaksü.

Parliament senden amenba mapang nung coronavirus wara dak sendakba tetuyuba ajak shidak beshitsü; Parliament senden 20 shi amentsü.

Yakümbö coronavirus wara kanga sashia prokbaa ajanga asükwa mongpu Parliament mamen, iba sülen budget aser

tzüingluruwa mongpu senden-a atsülanga liasü.

Lok Sabha aser Rajya Sabha senden naprong mapang ka nung dang agitsü aser wara dak sendakba tetuyuba ajak beshitsü. Parliament complex telungi aiterter aser Parliament building telungi aiter ajaki mask agitsü aser ajak dak coronavirus tashidak tendangtsü.

Sangküm küm tetenzüklen Uttar Pradesh densema state pongu nung assembly election agitsü lia asükwa mongpu Parliament amentsü.

Bengal yimtsüngtem nung teburtem atema scheme ka tenzüksü

Kolkata, November 18 (Agencies): West Bengal teburtem atema-a tetsürtem indang self-help groups (SHG) ama project tasen ka tenzüksütsü; iba ya yimdaklirtemi mapa bushitsü mesüra aayangtsü atema tangaleni aoba nokdangtsü atema lir, ta Brihostibarnü sorkar ketdangser kati metetdaksü.

Teburtem atema SHGs ya India nung tang mezüing West Bengal nung tenzüksü, aser teburtem atema tenzüksüba scheme dang 'Producers Group' ta ajatsü.

"Item teloki tilateri business inyaksü. State sorkari department balalai agütsüba schemes ajanga parnok yaritsü. Kobi melii item schemes ajanga tajangzük angubaji mapatong ka kübok aitdaktsütsü, iba sülen teburtemi iba mapatong kübok teyari ngua parnok sasa business tenzüksü," ta

ketdangseri metetdaksü. Iba dak alia cooperative bank temia tejangrarterem nem sen apotsütsü, ta pai ashi.

"Onoki tanga banks den-a jembidar. Kodang project tasen tenzükdir teburtemia melamela loan angutsü nungdak," ta paisa shisem.

Teburtem jagi kobala business inyaksü, ta asüingdangba langzüdang ketdangseri, teburtem jagi süngjanglijang lu, kiset shiruru metsüba aser chiyungtsü wazüka ayuba densema maparen balala inyaksü akok, ta metetdaksü.

"Group ka nung timba agi tebur 10 züingoktsü. Tetenzüklenbo onoki group shia nung tebur pongungu dang züingoktsü," ta pai ashi.

Iba scheme ajanga state kübok yimtsüngtem nung rongsenkettsüng jenjang tajungba akümtsü, iba denji külemi state nungi mapa bushia tangaleni aoba nokdangtsü, ta paisa metetdaksü.



Mumbai, November 18, 2021: Brihostibarnü Mumbai kübok Powai nung aliba Sai Auto Hyundai Showroom indang garage arongba mapang sepaitemi mi enseptsü merangba noksa nung angur.

EAM S. Jaishankar-i anogo asemnü atema Singapore semdang

New Delhi, Yimpoksüi/ November 18 (Agencies): India External Affairs Minister, S Jaishankar-i anogo asemnü Singapore semdanga Hokolbar aonung iba linük tonga ogo; pai Singapore Ato kilonser, Lee Hsien Loong ajurutsü aser minister aika den senden balala amentsü, ta Brihostibarnü Indian High Commission-i metetdaksü.

Brihostibarnep Dr. Jaishankar-i Senior Minister & Coordinating Minister for Social Policies, Tharman Shanmugaratnam ajurua senden menogo.

Singapore Senior Minister den tang alima nung rongsenkettsüng tensa atema o lemtepogo, ta Jaishankar-i twitter ajanga metetdaksü.

Tharman-ia Facebook post ka ajanga, "Alima aser regional rongsenkettsüng tensa atema jembigo aser linük ana tsüingda

taliba amalitepa inyaksü atema jembigo," ta lemsatop.

Hokolbarnü Bloomberg New Economic Forum nung Jaishankar-isa "Greater Power Competition: The Emerging World Order" onük nung o lemtepba sentong nung shilem agitsü.

Jaishankar-isa Defence Minister, Ng Eng Hen-a ajuru.

"Singapore Defence Minister @Ng_Eng_Hen ajuruogo. Asalentong dak sendakba nung o lemtepogo," ta Jaishankar-i twitter ajanga metetdaksü.

Iba dak alia pai Minister of Home Affairs & Law, Kasiviswanathan Shanmugam ajuru.

India ketdangserisa Hokolbarnü Minister of Foreign Affairs, Dr Vivian Balakrishnan aser Ato kilonser, Lee Hsien Loong na ajurutsü, ta Indian High Commission-i metetdaksü.



Thane, November 18, 2021: Tawa actress Kangana Ranaut-i India nunger chichiba nüchisobö 2014 küm ang angur, ta jembiba anema Brihostibarnü Thane nung Nationalist Congress Party women cell züingsemtemi longkak aitba noksa nung angur.

Canada province kar nung state of emergency sangdong

Vancouver, Yimpoksüi/Nov. 18 (TYO): Pacific tzükumlen otsü yanglua tzünglu kanga sashia aruba sülen tzümetsüing tesashi adokba agi kongshia alirtem kumzüksü atema Canada-i mitkartem yok aser Bodhbarnü tesem kar nung state of emergency sangdonga liasü.

Tan hopta British Columbia nung tzünglu kanga sashia aruba ajanga gari nung senzürtem molushi nung talen mali akum, nisung ka asü aser asem sama, nisung meyerijang aika pei ki yutsür ajen aser Vancouver aser yangji rongnendak tesemi khenyongi motettsüsa akum.

Canada Ato Kilonser Justin Trudear, shiba Washington nung US tir aser Mexico tir ajurutsü oa lir, paia tzünglu kanga sashia aruba ajanga tzümetsüing tetsübuttsüka adoka BC nung nisung takuma agi aser timtem

agütsü, ta ashi.

"Teyari agütsütsü nungi tenzüka timtem nung alirtem anizüker arutsü aser nungdakba ajak agütsütsü atema Canadian Armed Forces züngsem noklang aika British Columbia leni aor," ta pai ashi.

British Columbia Premier John Horgan-i state of emergency sangdong aser senzüsempingba nung tenokdangba agütsü aser tzünglu kanga sashia aruba den mopung aonba aser tzümetsüing agi asen province nung nübur ajunga dak kongshio, ta osangbener dang ashi.

"Asü-amar maneni ajurutsü akok," ta pai ashi.

British Columbia nung taküm meyi mapang otsü tasen yanglua kanga atsükba agi nisung 500 dak tema süa morkomi agi jila ka rongdoker

lia tan hopta iba tzüngsang ya ajurua liasü.

"Nisungi tzü-mopung melendaktsüba ajanga iba ama teti ataloker," ta Horgan-i ashi.

Gari nung senzür nisung 300 shi molushi ayimba ajanga taolen mali anendaka alirtem tayimtsü amshia kumzük.

Vancouver anüdoklen kanga mejungi kongshiba Abbotsford indang mayor, Henry Braun-i osangbener senden ka nung jembiba mapang, asenok iba timtem tatem kati maru, ta ashi.

"Tang ajangshia aliba ama tzüngsang mopung ano khen ajangshira, asenoki timtem tulu ajurutsü," ta pai ashi.

Vancouver northeast tsütsü kilometre 250 shi pilar Lillooet anasa molushi nungi tetsür ka tasü mang ngutetba sülen ano nisung tasü mang bushitepba mapang lir.

Sudan yimtiba nung rongrong tulu adok

Khartoum, Yimpoksüi/Nov. 18 (Agecnies): Mitkartemi tashiyim amshia October 25 nü sorkar atsüngdoker aruba mapang security forces ajanga longkak aiter nisung 15 khaseter anogo ka lir Sudan yimtiba nung rongrong tulu adoka yimti-yimtung anokshitsü.

Sorkar atsüngdokba anema longkak aitertem senshidaktsütsü mechi Brehostibarnü police temi tear gas khaloktsü, shirnok Khartoum north tsütsü aonong sangwa memejangi yimtung nung liasü.

Bodhbarnü longkak aitertemi khen atema yangluba atsü aser lenmang shibanga alibatem police temi raksatsü.

Ajisüaka mapang tatsüka lir longkak aitertem tanaben adenshia item atsü yanglua liasü aser iba mapang lenmang azüngtetsü mechi police temi ano tear gas khaloktsü, ta tenük kuli alirtemi ashi.

"Longkak aiter temia police dak long agi aom," ta nisung kati osangbener dang ashi.

Mitkar lenir General Abdel Fattah al-Burhan-i October 25 nü civilian lenirtem apu aser

state of emergency sangdonga liasü.

Al-Burhan-i aniba Sudan mitkartemi sorkar tashi rakzük, transitional government anentsü, civilian aser yimten yimsüsür aika apu aser state of emergency sangdonga liasü.

Iba mera ya ajanga mapang talangka nungi yimsü süa arusang lenir Omar al-Bashir atsüngdoker küm ana shi lir democracy yimya nung yimsü asütsü atema inyakyim ajunga melenshiba anenadok.

Taoba hopta al-Burhan-i Sovereign Council tasen shima linük indang transitional government melen, kong civilian aser mitkartem dena liasü.

Al-Burhan-ibo mitkari mera agiba ya tashiyim amshia sorkar atsüngdokba masü saka civilian nem melenoktsüba yimya aser maparen jangjashiba lir, ta ashir.

Bodhbarnü Khartoum aser danga yimtitem nung nisung meyerijang aikati longkak aita liasü, saka sorkar atsüngdokba sülen mitkartemi tashi tulutiba amshia liasü.

Bodhbarnü kisüing nung northern Khartoum nung timba

sür nisung 15 tepset, anungji tawa longkak aiter asüba 39 jungogo, ta doctor temi ashir.

"Yimjung nung longkak aiter dak azüdokshiba aitsür aser Sudan nung meimchir temeden akumtsüba amshitsü aser kumzüka ayutsü ajungshir," ta US State Department's Bureau of African Affairs ajanga Twitter nung Bodhbarnü ashi.

Sudan tesem ajungalen internet services ajunga amai shibangja aser telephone line tem nung timtem agüjaka Bodhbarnü iba sentong ya ayongzüka liasü.

Central Committee of Sudanese Doctors (CCSD) ajanga sangdong ka nung ashiba agi, security forces temi linük yimtiba nung tesem balala nung injang kanga sashia amshi aser injang agi aika yirutsü aser karbo kangasa mejungi yirur lir.

Khartoum hospital telung nung yirur alirtema security forces temi apu, ta CCSD ajanga ashi.

Brehostibarnep phone line tem junga kumer liasü, saka internet services bo tesem timba nung meliasü.

(Maneni tapak 10 nung...)



Doctors Without Borders ajanga sayaba noksa ka nung süng agi yangluba rong ka sünga migrant 99 mener Libya tzükumlen teyari agütsüba rong ka anasai aoba angur. Doctors Without Borders ajanga amshiba rong kati iba rong nung alirtem kumzükba mapang rong telung nung nisung ter sür aliba ngutet, ta ashi.

Sür Küm ka ajungba menungra bilemteter Lt. Mr. Bendangtoshi Pongen



19th November 2020

Aba na onok asoshi abala tajungtiba teti alitsü. Nai onok nem temeim agütsüba, tajungshi O agütsüba, talisa nai onok anepalua yariba onoki teti menungra bilemteter aser mamateter.

Küm ka süiogo, na onok den mali,saka ne temeim onok den teti alitsü.

Aba na kanga menungrar.

- Temeim Kinungtsü, Chirnur aser Kinüngertem.

OFFICE OF THE KOHIMA CHUNGTIA SENSO TELONGJEM (KCST)

KOHIMA - 797001: NAGALAND

Tsüngrem tenüing sanga akhüm agütsür

Teküpoklen agüja aliba Chungtia nungersensotem, Kohima sasep nung kwikati sorkar tenzüka wadang balala nung temaba jenjang tongtetogo, Kohima Chungtia Senso Telongjem (KCST) office nungi Tsüngrem tenüing sanga nenok nem akhüm agütsür.

1. **Shri. K. Sentisuba** promoted to Additional Director, Treasures and Accounts.
2. **Shri. M. Benjongnungsang** promoted to Joint Secretary under P&AR Department, Nagaland Civil Secretariat.
3. **Smt. Moalila** promoted to Deputy Secretary under P&AR Department, Nagaland Civil Secretariat.

Yimer lokti nung len tuyur aser nüktang tajung kaka süa aruba ama ano iba temaba jenjang nungi sorkar wadang nunga tali tenendakba nung tenzüksü Tsüngrem tenüing nung moatsür.

Lanusungba
President, KCST

I. Moa Longchar
General Secretary, KCST

OFFICE OF THE MOPUNGCHUKET SENSO TELONGJEM

KOHIMA : NAGALAND

TENÜNGSANG AGÜTSÜR

Mopungchuket Senso Telongjem Kohima ajanga Wb. **Lanuyapang** Under Secretary jenjang ajangzüksetba atema tenüingsang agütsür.

Tsüngremi nü wadang nung ano tali moajangma ta sensosanger ajak sarasadem.

Sd/-
NUNGSANGWAPANG
President

Sd/-
JAMITE JAMIR
Secretary

OFFICE OF THE CHISA SEMPO KIDONG MONGSENYIMTI VILLAGE

B.P.O. MONGSENYIMTI. P.O. CHUCHUYIMLANG.

SANGDONGER

Mongsenyimti Chisa Sempo Kidong tsüngta mangatettep ken o lia küm aika aruogo. Saka tanü 17th November' 2021 anügo GPRN Ao Region akhüm nung kidong general meeting mena tatsü talang ajak angatettepa jempir iba ken o tanü tempanga ayur.

Anungji akhi nungi asen kin kota sobaliba-a aru, yamaji kusa-tsünya nung tanü nungi ka küma longjemshir teputep nung lia aotsü ajaki molungtepa lemtetba sangdonger.


Secretary
(REPALEZUK JAMIR)
CHISA SEMPO KIDONG
MONGSENYIMTI VILLAGE


President
(LIMATOSHI JAMIR)
CHISA SEMPO KIDONG
MONGSENYIMTI VILLAGE

ALI AYOKER

Tir Yim anasa Seithekima nung, Nonee Resort junction nungi kilometer tasadang ka shi pilar ali takong tayoktsü lir. Ali tasazük Pura 7 (seven) lepzüka ayoktsü akok. (Rate Negotiable).

Contact : 9366045902 / 8787566694

23 Impur A/C Congress party pur NDPP nung aden



23 Impur Congress Party NDPP nung adenba sentong agir külen Nagaland NDPP President - Chingwang Konyak den NDPP lenla balala nungi ketdangsürtem aser NDPP nung adenertem külemi tangokba noksa nung angur. Kobulong, 18th November, 2021.

Kobulong, Yimpoksüi/ November 18, 2021 (TYO): 23 Impur Assembly Constituency Congress Party (INC) pur Nationalist Democratic Progressive Party (NDPP) nung adenba sentong tulu ka Asektkong Senden Salang Kobulong nung agia liasü.

Iba sentong nung Chief Patron & Nagaland NDPP tir, Chingwang Konyak den Nagaland NDPP central office, regional office aser party telen tabensa nungi tenzüker aika arua shilem agia jembia.

NDPP tir, Chingwang-i jembidang, kechisarena ajak asoshi mongpu ka lir ta Laishiba nung ashiba ama mapang ka Naga nungeri Congress party kanga sapu saka tang ya NDPP sapuba mapang ka lir, ta ashi.

Taoba mapang sorkar

mejungu aliba reprangteta NDPP-i 2018 election nung sorkar tajung agütsüsü ta ashiba ama sorkar kümer külen nungi tanü tashi sorkar shitak arudar, ta ashi. Tang opposition maliba sorkar akümba ya talisa Naga yimden telemtetba dak rangloker yangluba lir, ta jangjashitsü. Yamaji NDPP-i Naga yimden dak sentakba nung apular tajung ka ama inyaka arudar, ta paisa shisem.

Naga nunger yimden telemtetba ka dangi marura akhi ama election ji agitsü, anungji, tang nungi election maparenji tenzüksüla, ta paisa party tenzükerterem ajungshia liasü.

23 Impur AC nung Congress party pur NDPP nung adenba asoshi pelaa agizükba paisa metetdaksü. Kechisarena asoshi mongpu ka lir ta ashiba ama tang ya Nagaland nung

NDPP wangshiba mapang ka lira ser taruba election nungjia NDPP nungi teimba adoktsü imlar, ta paisa shisem.

Iba sentong nung Nagaland NDPP central team nungi Sr. Vice President - Charlie Sekhose, Working President - Amenla, Adviser - T.N Mannen, Youth Vice President - Meyisanger Lemtur, NDPP Mokokchung Region President - N. Bendang Jamir, NDPP Region Impur In-charge - L. Moa Lemtur, NDPP 26 Aonglenden A/C president - Nungsangmeren, NDPP 23 Impur AC president - Wapang parnoki shilem balala agia tepela o den tajungshi o lemsatep.

23 Impur Congress Party tenüng nung President - Temjensangba aser AGS - Purtooshi tenati shilem shilem agia liasü.

ST Morcha BJP Nagaland-i 'Janjatiya Gaurav Divas' mungogo



Kohima, Yimpoksüi/November 18, 2021: Wanphong Konyak, Kruto Tetseo aser tanga ST Morcha, BJP Nagaland State Unit ketdangsürtem külemi tangokba noksa yangi angur.

Kohima, Yimpoksüi/ November 18, 2021 (TYO): Linük nung tanüngba tesem jangyumedema, Schedule Tribe (ST) Morcha - Bharatiya Janata Party (BJP) Nagaland State Unit-i Hombarnü (15.11.2021) 'Janjatiya Gaurav Divas' (Tribal Pride Day) mungogo, ta sangdong ajanga metetdaksü.

Iba sentong nung, ST Morcha, BJP Nagaland State unit indang president, Wanphong Konyak-i jembia liasü.

Linük nung Tribal nüburtem indang taküm, sobaliba aser parnoki inyakba nung benjongteptsü asoshi November 15 anogo ya 'Janjatiya Gaurav Divas' ama sangdongba atema Wanphong-i Ato Kilonser, Narendra Modi dang pelaba

metetdaksü. "Iba anogomung amungtsü sangdongba ajanga Ato Kilonser Narendra Modi-i linük nung telok, tamangba yimsü aser kin shia atema temeim aser nukla tulu aliba sayur. Linük tesem ajanga nung prokshir aliba tribal telok balala atema iba anogomung ya khonang tulu lir," ta lai ashi.

Wanphong-i, India indang tashi tulutibaji alima dang kin balala telongjem nung litetta sayubaj asütsü. Tanga linük nungbo yimtenren, tamangba aser tanga maparen atema 'minority' nem maangka magütsü amokbanger inyaker. Ajsüaka, 'Janjatiya Gaurav Divas' ajanga linük nung telongjem aliba sayutsü asoshi

Ato Kilonser Modi-i tasa atongtet, ta tutetta ashi.

Iba inyakyim ajanga alima dang temeim, akhümtsübuba aser mapa tamajung meinyakba (non-violence) ajanga nübur longjemer litetba sayuogo, ta lai shisem.

Janjatiya Gaurav Divas ajanga Northeast India, kong indigenous kin balala alir, iba tesem nung nübur mulungiang kongshio, ta lai ashi; aser tribal nüburtem jangjatetba atema Wanphong-isa BJP lenisüba aser India Sorkar dang pelaba shisem.

ST Morcha, BJP Nagaland State Unit, General Secretary, Kruto Tetseo-i, State nung district ajanga nungi virtual ajanga ST Morcha BJP Nagaland team den külemi iba sentong nung shilem agiogo, ta metetdaksü.

Assam CM Himanta-i ULFA (I) indang ken o jangjashitsü

Guwahati, Yimpoksüi/ November 18 (Agencies): ULFA (I)-i nüjiso akhangba sensaksemtsü atema Assam Chief Minister renema lir ta media osang balala ajanga prokshiba ya Chief Minister Himanta Biswa Sarma-i aitsüogo.

Media osang aija Sarma-i, Chief Minister shingaia India Sovereignty dak sendakba nung shinga dena sensak

OFFICE OF THE KOHIMA JAPU SENSO TELONGJEM

KOHIMA: NAGALAND

Dated Kohima the 17th Nov. 2021

TENÜNGSANG AGÜTSÜR

Asür. Er. Dangchet Pongen'er jabaso Wb. Sentiyanger Pongen-i Additional Secretary, Government of Nagaland, Kohima menden tongtetba atema Japu Union Kohima-i pa nem tenüngsang agütsür.

Tarutsü nunga pai inyakba wadang nung maneni takok angutsü asoshi Union-i sarasademtsür.

Sd/
(TINUWATI)
General Secretary

Phek nung sentong ka ayongzük

Phek, Yimpoksüi/November 18, 2021 (TYO): Bodhbarnü (17.11.2021) Town Hall, Phek nung 'Community Awareness & Sensitization' sentong ka ayonga agiogo. Iba sentong ya Nagaland Education Project - The Lighthouse- Nagaland Enhancing Classroom Teaching and Resources (NECTAR) ajanga ayongzüka liasü, ta sangdong ajanga metetdaksü.

Iba sentong nung, Deputy Commissioner Phek, Razouvolie Dozo, NCS-i, ajak nem education tajung (quality education) agütsüsü kanga tongtibang aser tesayurtem dang pei dak aketba sempet tajungtiba amshia tesayuba agütsüsü asoshi ajungshio.

DC-i ashiba agi, Nagaland nung lokti aser sorkar na longjemer/amalitepa inyakba tasa linük tesem ajungai jangjaa lir. Anungji, shisaliok reju nunga tanurtem atema lenmang balala bushitsü asoshi school management tekolakpurtem dang longjemer inyaksü asoshi pai

ajungshia liasü.

Lenla aisü nung asen lokti tangar memene lir ta pai ashi. Iba dak sendakba nung proxy/ bogus tesayurtem (teacher) jangjatetsüla, ta pai metetdaksü.

Dozo-isa tesayurtem dang pei dak aketba sempet tajungtiba amshia tanurtem (kaketshir) sayua anitetsü asoshi ayongzük aser kaketshirtem ajungmesotsü atema tesayurtemji nübu tetemjen, ta pai shisem.

Maneni, iba project indang nükjidong aser asalentong tem Deputy Project Director, NEP- The Lighthouse NECTAR, Avelu Ruho-i metetdaksü. Iba sülen, Programme Monitoring Unit (PMU) team ajanga "community ownership, investment & collective management" nung presentation agüja liasü.

Tesayurtem tsüngda sensaksem sentong agia liasü, kong DEO ajanga iba sentong ketdangsüa agi aser Himing-i tatem o jembia, ta kasa sangdong nung shia lir.

Mon nung single use plastic ajak nokdang



Dimapur, Yimpoksüi/ November 18 (TYO): ADC Mon & Administrator, Mon Town Council, Y Chingyak Konyak, NCS-i November 16 nü sangdong ka ajanga, December 1 nü nungi tenzüka Mon jila nung single use plastic ajak tenokdangba agütsüba sangdongogo.

Single use plastic küboki item ya aiter:

1. Handle aketba maketba aser tasazük kecha tebendang makai plastic carry bags ajak

2. Auso, plastic marok, straws, stirrers amala plastic cutlery ajak
3. Styrofoam (Thermocol) agi yangluba cutlery aser tanga decoratives tem
4. Polythene
5. Nylon
6. Poly-Vinyl-Chloride(P.V.C)
7. Poly-Propylene
8. Poly-Styrene

Iba tetuyuba sülen manidakertem ajak temzüng ozüng dak ajemdaker tapet temerenshi agütsüsü, ta DC-isa metetdaksüogo.

Brehostibarnü tweet asü.

TOI-i Brehostibarnü, ULFA (I)-i nüjiso akhangba dak sendakba nung sensak asemtsü atema Chief Minister Sarma renema lir, ta sangdonga liasü.

"Assam Chief Minister tem rongnung tang mezüngbuba Himanta Biswa Sarma-i Bodhbarnü Ulfa (I)-i nüjiso akhangba ya bentettsü nungdaker ta sangdongogo," ta iba osang nung shia lir.

mesemtetsü, ta ashi.

"@timesofindia nung iba osang ya ngua ni tsübur. Chief Minister shingaia India Sovereignty dak sendakba nung shinga den sensak mesemtetsü. Iba ya sensaksemtsüba ken o masü. Jenjang balala süaka asenok ajak India nunger aser India sovereignty kümzüksü asoshi alir. Ni iba osang aitsür. Iba osang ya teyazü," ta Sarma-i

13th NAP IR Battalion-i 'Nagaland Police Duty cum Sports Meet' kokogo



Dimapur, Yimpoksüi/November 18, 2021: NAPTC stadium Chumukedima nung 39buba Nagaland Police Duty cum Sports Meet 2021 shibangba sentong nung Dy.Chief Minister Patton-i 13th NAP IR BATTALION nem takok marok agütsüba yangi noksa nung angur.

Dimapur, Yimpoksüi/November 18, 2021 (TYO): Nagaland Police Duty cum Sports Meet nung team 32 nungi 13th NAP IR BATTALION-i kokogo (overall champions). Brehostibarnü NAPTC Stadium, Chumukedima, Dimapur nung tembang, ta sangdong ka ajanga metetdaksü.

39buba Nagaland Police Duty Cum Sports meet shibangba sentong nung, Deputy Chief Minister Nagaland, Y.Patton alakteta tejaoker ama aruagi denogo aser pai, 'Nagaland Police Duty cum Sports Meet' ama saisapong asayamung ajanga nisung ka tanela asentenshitsü asoshi yarir aser ibaji ajanga Police kibongtem tsüingda tesendaktep tajungba yanglushir, ta ashi.

Patton-i, tajung tsütsü tetoktepba tanela renloka aotsü

atema nukjidong yur iba ama asayamung ayongzüksüla ta lemsatep.

"Police mapa ya tayongzükba tuluka lir aser kanga tasak asütsü akok, saka iba ama saisapong asayamung ayonga asayara officer aser külem inyakertem tekolok aser temang anema aliba tsütsü yaritsü," ta Patton-i ashi.

Patton-i, Police Meet nung games aser saisapong tem asayaba dak alia, police inyakyim dak sendakba Investigation, Drill, prangbong injang amshiba yimya, wireless communication aser Shooting tem sayutsüla, ta ashi.

1967 küm mezüing Police Meet agir külen nungi Nagaland Police nung discipline balala nung saisaponger tajung aika adokogo, ta Deputy Chief Minister-i ashi.

Chief Minister Neiphiu Rio

lenisüba kübok Sorkari Nagaland Police Complex, Chumukedima nung Nagaland Police Sports Battalion ka lapoktsüner aser iba atema Nüngshilong ka semzüksüogo, ta pai metetdaksü.

Patton-isa, iba complex telungtet nung Astro Turf Football Ground teyangludak aliba indang metetdakja liasü.

Nagaland Police-i saisapong wadang nung jenjang ka ajangzüketter asünung, Naga nung atema saisapong tetemjen/tapet talisa Badminton, Boxing, Taekwondo, Wrestling etc tem agizüksü atema mapang tongogo, ta Patton-i bilemba lemsatep.

39buba Nagaland Police Duty cum Sports meet 2021 takok ngua tembangba shilem agirtem aser asayamung ayongertem nem tenüngsang agütsüba mapang, Patton-i, tarutsü nung saisapong wadang tsütsü Nagaland Police-i temaba jenjang tongtetsü imlar, ta ashi.

Iba meet shibangba sentong nung Tongpang Ozukum, DGP Nagaland, T.John Longkumer IPS, Senior Police officers, Retired Police officers aser tanga tongtibang nübutem aruagi denogo.

Sentong tetenzüklen Patton-i 'band salute' agizük aser Drill competition final sayu. Iba sülen 15th NAP (IR) MBn. Pipe band aser PTS Brass Band longjemer musical presentation ka agüja liasü.

Patton-i takok angur 13th NAP IR BATTALION nem takok marok agütsü aser iba sentong tembang, ta kasa sangdong nung shia lir.

Senior National c'ship nung Nagaland Sepaktakraw Team-i shilem agitsü

Dimapur, Yimpoksüi/November 18, 2021 (TYO): Sangküm - 2022 Goa nung asayatsü aliba 36th National Games dak sendakba nung, shilem agitsüpur team tem atema selection inyakyim tenzükogo, ta sangdong ajanga Nagaland sepaktakraw association Secretary, Holshe Khrieo-i metetdaksü.

Dimapur nung, Nagaland Sepaktakraw Team-i meranga training agiba sülen, 31buba Senior National Championship nung shilem agitsü atema parnok Punjab-i ogo.

31buba Senior National championship ya November 21-25, 2021 tashi asayatsü terenemba lir.

Taruba 36th National Games - Goa 2022 atema 31buba Senior National sepaktakraw championship ya qualifying round ama asayatsü. Mapang talangka nungi Nagaland sepaktakraw association-i asayar tajung anitetta takok angutsü asoshi inyaka aruogo aser iba championship nung team qualify asütsü imlar.

Sepaktakraw asaya tajungba

melenshia aotsü asoshi nungitta yariba atema Nagaland sepaktakraw association-i department of youth resources and sports dang maneni pelaba metetdaksü. Iba den külemi association-isa Director General of Police (DGP) Nagaland danga pelaba shisemer, kong DGP teyari aser nungitta ajungmesoba ajanga Nagaland sepaktakraw association-i national aser international asayamung balala nung jangratema shilem agia aruogo, ta kasa sangdong nung shia lir.

Sudan yimtiba nung ...

Khartoum aser anasa aliba yimitem sendaktepba apu tem tanaben lapoktsü aser Khartoum kübok tesem timbalen traffic shidak jaja liasü.

Mitkartemi sorkar atsüngdokba ajanga linük balalai taitüsü ola adok, aikati teyari agütsüba soita ayu aser tashi tulu aliba linüktemi tekeratiba nung civilian nem tashi meyipa agüjang, ta akhang.

Mitkari tashiyim amshia sorkar atsüngdokba mechi United

States-i Sudan nem sen million \$700 shi teyari agütsütsü aliba soita ayu.

Iba sülen internet shibanga osangtsüsang agitepba nung timtem agüjaka anogoshi amai longkak aita arur, aser activists temi graffiti aser SMS message tem ajanga longkak aittsü ayongzükter.

Taoba ita mitkari sorkar atsüngdokba sülen sorkar ketdangsür aser yimten yimsüsür 100 dak tema pua lir aser ano

(Tapak 8 nungi...)

longkak aiter aser activist tema aika pua lir. Democracy busema nokdakba telok temi Sovereign Council meyipa magütsü tashi maneni longkak aittsü nangzükba lir.

Ita tetenzüklen osangbener den jembiba mapang, civilian sorkar nem tashi agütsütsü aser transitional period sülen sorkar kecha nunga shilem magütsü, ta al-Burhan-i nangzükba liasü.

Saka taoba hopta Sovereign Council tasenba nung pa tekolakba, ta pasasa sangdonga liasü.

Garbine Muguruza-i WTA Finals kokogo

Guadalajara, Yimpoksüi/November 18, 2021 (Agencies): WTA Finals asayamung tetsür kija final asayamung, Spain tsür Garbine Muguruza-i Estonia tsür Anett Kontaveit tsükdaktsüba sülen, lai WTA Finals kokogo.

Garbine-i WTA Finals mezüing takok angur asütsü. Iba final asaya nung lai 6-3, 7-5 agi Anett tsükdaktsü aser Mexico nung lai asaya ana tamakok anguba dak alaka asaya 14 tashi takok ngua jenjang tajungba yangluogo.

Muguruza, shibai 2018 küm Monterrey, northern Mexico aser 2019 küm atonga title ana takok angur, women's season tatembangbuba asayamung takok angur Spain tsür rongnung la mezüing kümogo.

"U.S. Open nung WTA CEO Steve Simon-i Guadalajara nung WTA Finals nung asayatsü lenmang lir ta kü dang ashiba bemtetter aser idanggi kü mulung nung tejembiba ka ait; aser tanü final tashi tongteta title nguogo," ta asaya temer sempet agütsüba mapang Garbine Muguruza-i ashi.

"WTA Finals nung asayatsü maangka anguba ya mangdang ataloker ama lir," ta lai ashi.

Tan Season asayamung tatembangbuba nung Muguruza-i pezübenbuba asayar asütsü aser iba asayamung mezüing takok angur asütsü.

Lai takok anguba ajanga Spain nem mezüing WTA Finals title naroküm bener arutsüogo aser taruba Hombarnü WTA ranking agütsüba mapang taküm Muguruza world no. 3 nung

tembangtsü jenjang ajangzükteretogo.

Taoba ita Chicago asayamung nunga lai takok angur aser March ita Dubai final nung lai Czech tsür Barbora Krejčíková tsükdaktsü. 2017 küm Wimbledon nung Muguruza-i tanabuba major title akokba sülen, March ita lai anguba title ya tulutiba asütsü.

Kasa asayamung tetsür tarep final asaya nung, Barbora Krejčíková aser Katerina Siniakova nati Hsieh Su-wei aser Elise Mertens madak 6-3, 6-4 agi kokogo. Krejčíková aser Siniakova nati Roland Garros aser Madrid asayamung nunga double title koka lir aser taküm Tokyo 2020 Olympic Games nung tenati gold medal nguogo.

"Tanü bilemba ama asayaogo. Künapronglai tasa ajak amshia asaya ama bilemer. Bilemba ama asaya aser takok ngutetba atema pelar. Team tajung ka ama künaprongla kanga medema asayaogo," ta asaya temer sülen Krejčíková-i ashi.

"Tan hopta nungi künaprongla junga asaya aruogo. Asaya mapang tetokteper nem maangka magütsü jeretpera asayatsü nüngdaker ta bilemba liasü aser tanü bilemba inyakogo. Künapronglai junga asayadar aser kati ka tebilemba angadanga aru. Iba takok marok koktetba atema pelar," ta Siniakova-i shisem.

Taküm küm atema WTA Finals ya Guadalajara nung asayaogo. Sangküm - 2022 WTA Finals Shenzhen, China nung asayatsü.

2022 under-19 World Cup nung New Zealand masayatsü

Auckland, Yimpoksüi/November 18, 2021 (Agencies): Sangküm Men's Under-19 World Cup asayamung nung New Zealand masayatsü. Iba World Cup temer sülen pei talidaki (New Zealand) meyipa aruli temzüing agi melaba ama asayar ajak quarantine asütsüsa akümba ajanga iba asayamung nung shilem magütsü lemtet.

Parnok (New Zealand team) melen, Group D nung Scotland aniokogo aser iba group nung asayamung tayonger telok West Indies, Australia aser Sri Lanka dena lir.

Tebur Under - 19 World Cup asayamung ya sangküm January 14, 2022 nungi tenzüksü aser February 5, 2022 nü final asayatsü. Iba World Cup asayamung ya Caribbean nung mezüing asayar asütsü.

Team 16 tokteptsü aliba cricket asayamung nung defending champion

Bangladesh pur Group A nung England, Canada aser UAE team den külemi ataja lir.

Pezüben tashi iba asayamung takok angur India team pur South Africa, Ireland aser Uganda den group ka nung lemzükja lir. Ano, Group C nung Afghanistan, Pakistan, PNG aser Zimbabwe dena lir.

Under 19 World Cup ya Antigua and Barbuda, Guyana, St Kitts & Nevis aser Trinidad & Tobago kübok tesem 10 nung asayatsü.

January 25 aser 31, 2022 tsüingda Trinidad & Tobago nung Plate competition ayongzüksü aser January 26, 2022 nungi Antigua & Barbuda nung Super League asayatsü.

Maneni, semi-final ya February 1 aser 2, 2022 nü tesem ana - Sir Vivian Richards Cricket Ground aser Coolidge Cricket Ground nung asayatsü. Iba sülen February 5, 2022 nü Sir Vivian Richards Cricket Ground nung Final asayatsü.

BILEMDANGANG

"Takar kümnüa Tsüngrem bushira sensak tia nung lia molumi aotsü."